

## Mî'adında Hesâb Vermeyen Muhâsib Mes'ûller Hakkında İcra Olunacak Mu'âmeleye Dâir Nizâmnâme Layihâsı

**Birinci Madde:** Merkez ve taşrada müstahdem ve Dîvân-ı Muhasebat'a hesâb 'itâsiyla mükellef olan muhâsib mes'ûller her seneye aid idâre hesâbını müddet-i mahsûbiyenin inkizâsından 'itibaren nihâyet iki mah zarfında tanzîm ideceklerdir. Bu müddet Maliye Nezâreti Vezne-i 'Umûmîsi hesâbı için altı aydır.

**İkinci Madde:** Birinci maddede ta'yîn olunan müddet zarfında merkezde Dîvân-ı Muhâsebât'a hesâb vermeyen ve taşrada hesâbını ihzâr eylediğini telgrafla kezâlik Dîvân-ı Muhasebata ihbâr etmeyen muhâsiblerin hitâm-ı mî'adı ta'kîb iden ayın ilk günü nısf ve on beşinci gününe kadar hesâblarını vermedikleri veya ve ihzâr eylediklerini ihbâr itmedikleri takdîrde on altıncı günü tam maaşları kat' olunur. Bu cezalar Dîvân-ı Muhasebat müdde'-î 'umûmîsinin talebi üzerine Dîvân-ı Muhasebat'ça tedkîkât icrâ' ve esbâb-ı teehhür muhâsiblerden suâl olunduktan sonra taht-ı karâra alınır ve devâir-i aidesince derhal infaz olunur. Tam maaşlarının kat'ına karâr virilen muhâsibler hakkında başkaca mu'âmele-i kanûniye 'ifâ olunmak üzere Dîvânca derhal mensûb oldukları nezâretlere iş'âr-ı keyfiyet idilür. Hesâbını hazırladığı ihbâr edildiği halde tedkîke mübâşeret olduğu zaman hesâbının hazır olmadığı tebeyyün eden muhâsibler hakkında dahi mu'âmele-i kanûniye 'ifâ olunmak üzere kezâlik mensûb oldukları nezâretlere keyfiyet iş'âr olunur.

**Üçüncü Madde:** Bir devre-i hesâbiye zarfında vefat ya da infikâk eden muhâsib-i mes'ûller mu'âmelâtı o devre-i hesâbiyeye âid hesâbât meyanında rü'yet edilir.

**Dördüncü Madde:** İdâre-i hesâbatın tanzîmi mükellefiyeti mî'ad-ı muayyeninde ve evrâk-ı müsbitenin iraesî vazifesi idâre hesâblarının zaman-ı tedkîkinde muhâsib mevkiinde bulunan zata aiddir.

**Beşinci madde:** Nâ kâbil-i tedkîk hesâb veren yahud verdiği hesâbın tedkîk ve intâcı emrinde ikâ'-ı müşkilât eden muhâsibler müdde'-î 'umûmîlikden mütalaa alındıktan sonra Dîvân-ı Muhasebat'ça bi't-tedkîk evvela nısf maaşının ve yine müşkilât ikâ'ında ısrar ettiği takdîrde tam maaşının kat'ıyla beraber hakkında mu'âmele-i kanûniyye 'ifâ olunmak üzere mensûb olduğu nezârete iş'âr-ı keyfiyet olunur.

**Madde-i Muvakkate:** İş bu nizâmnâme ahkâmı sinîn-i sâbıka hesâbâtı hakkında dahi câridir. Şu kadar ki birinci madde de ta'yîn olunan müddetler sinîn-i sâbıka hesâbâtı için nizâmnâmenin târîh-i meriyyetinden hesâb olunur.

**Altıncı Madde:** İş bu nizâmnâme târîh-i neşrinden mu'teberdir.

**Yedinci Madde:** İş bu nizâmnâme lâyhâsının icrâsına Hey'et-i Vükelâ me'mûrdur.

İş bu nizamname lâyhâsının mevki'-i meriyyete vaz'ını nizâmât-ı devlete 'ilâvesini irâde eyledim. **BOA, İ. DUİT**, Nu. 19/45, 21 Z 1334 (19 Ekim 1916).

